

Alatxia

Paulo Tyyriti, Alatxia Mahãdu-ò

¹ Jiarỹ Paulo, rybeõmy nodu rare. Inyõ riwateònyõhyyre. Jesuisi Kristule, Deuxu inytyby, Kristu ixixadỹỹdu-wana riwateònyre.

² Jiarỹ ityhydỹỹdu seriòre-wana. Kaa watyyritireny rewahinyreri Alatxia bedeludu mahãdu-ò, ibutumy dohodỹỹna mahãdu-ò, ityhydỹỹdu mahãdu-ò wahe.

³ Ruxetòena ywina-wana adeereny kanakemy idi watxireri Jesuisi Kristu-ribi, Deuxu inytybyreny-ribi.

⁴ Jesuisi rexiwahinyre iny òrarureny-ribi iny ritarenykemy. Wiji bede aõmydỹỹnabina-ribi iny ritarenykemy. Kia dori Deuxu-ò inytybydeewimy rare.

⁵ Tamy àlàna aõu aõu kanawahimyhỹke.

⁶⁻⁷ Jiarỹ bede reòtiinyra, rybe witxiraõ eleelemy tetyhynymahãteki. Rybewihikỹ witxira ihoõre. Juhuu Kristu taruxetòena-di bedebina-ribi aratarenyre. Inyõ adee rare. Idi Deuxu Rybewihikỹ riwitxiranykemy. Tai tahe atyhydỹỹna ribinadỹỹnyra. Tai tahe kiamy adee rarybera.

⁸ Inyõ aõbo, jiarỹ aõbo, ada biuludu ỹju aõbo, adee Rybewihikỹ witxiraõ rarybekeki, Deuxu kyarana tamy kedeseekemy idi watxireri. Rybewihikỹ-ò juhu waribi taholatenynte. Kia sohojile inatyhyre.

⁹ Iwese rarybere wese ixityre ararybekre. Inyõ Rybewihikỹ riwixiranykeki, aõmybo juhuu taholateny-ribi, Deuxu kyanamy resekre.

¹⁰ Deuxudeewimy taheka watxireri hãbudeewimy aõkõ. Jiarỹ hãbudeewimy aratximyhỹkeki Kristu deòdu aõkõ jiarỹ rare.

¹¹ Aõmybo rarybemyhỹre hãbu-ribi rare. Kia Rybewihikỹ tyhy rare. Kia bierybenyke.

¹² Kia tihãbuõ-ribi adoholaõhymahãde. Hãburybe-ki aõkõ reeryre Jesuisi Kristule dori kia riwaerynanyre.

¹³ Kaiboho taholatenyte, iwese jiarỹ judeu mahãduy-ki raremahãu Iu Deuxu ityhydỹỹdu mahãdu aõbinamy rewinydỹỹnanymyhỹre. Idi ariixãwididỹỹnykemy rarewãhã.

¹⁴ Wamahãduy-ki sõwemy iratyre raremahã judeu mahãdu bedede ywina ywidỹỹ-ki. Idi retyhynyhyymahãre wahona mahãdu ratyre, byrena erỹdỹỹna-ki.

¹⁵ Iribi tahe Deuxu riwamyre taruxetòena-ki. Ratohouãnyõlemy rareò juhu riwahitxinyre.

¹⁶ Wadee Deuxu tariòre riteòsinykremy ratximyhỹ judeukõdu mahãdu-ò tuu ararybekemy wadi ratximyhỹ. Iu inyõ dee aõmy rarybeõhyyre Jerusalẽ hãwã-ò raõhyyre.

¹⁷ Ròtyhydỹỹõmy raremahãu. Deuxu deòdỹỹna mahãdule rỹiramyhỹ. Ihãrele tahe tamy rybemy raõra. Iribi tahe rahònyra Arabia-ò. Idi tahe ixityrele adòòsede Damasu-ò.

¹⁸ Inataõ beòramy heka kowa-ki reijere. Idi tahe rare Jerusalẽ-ò Pedro roramy. Tahe bedede reijere waiyre txumy tai.

19 Ijõmy heka rabiõhyyre deòdỹỹna mahãduõmy. Txiaulemy heka rabire, Kristu seriòremy.

20 Ka heka watyyriti inatyhy rare. Deuxuko-txi inatyhy rare.

21 Idi Siria bedeo-ò rare, tule Silisia bedeo-ò.

22 Judeia bedeo-ki Kristu dohodỹỹdu mahãdu wamy lobixidu aõkõ rỹira.

23 Uritỹỹna roholamyhỹre: –Kia juhu inyhudurenymy inydireny raremyhỹ, wiji tahe tyhyna-di dobedeerydỹỹnanyhỹde. Juhu tahe tii tyhyna rahukemy riwisỹnyre.

24 Kia ibutu òraru-ki tahe Deuxu-ò dealãmehỹde wamy, Paulo wahe.

2

1 Waòinaubiòwa reurò beòra-di rexihureu, ixyby Jerusalẽ-ò ròòsere. Banabe, Txitu-wana redyre.

2 Rawãhãre heka rasi wese-ki aõmybo rabireki. Retỹnynyre iny-ò iwese inywitxira-ò rarybemyhỹremy. Dohodỹỹdu mahãdu ratyre retare tamy rihitxinyre rarybekemy. Tuu arierykemy watxireri ywimy watxiwãhãremy.

3 Txitu wawana ihỹre, tii judeukõdu mahãduõ hãrele tahe itõtyky resymy rarybeõhyrenyre. Tii-boho waki ibinamy rahaõhyrenyre.

4 Idile rõhõtinyinmyhỹre ityhydỹỹdukõdu mahãdu. Tiiboho nalòdenyde waixãwididỹỹnarenyn-ò retehekremy, iny Kristu-ki ijõdiwãhãre-ò. Tiiboho ixiwesemy iny-di risỹnykemy ratxirenyreri. Tiiboho ityhydỹỹdu wesemy rexisỹnmyhỹre.

5 Tamy jiarỹboho raholarenynõhyymahãre inatyhymy Rybewihikỹ aribireny ritaõhyykemy.

6-9 Dohodỹỹdu mahãdu ratyre mahãdu heka Joaõ, Txiau, Pedro-wana rare. Tiiboho ibutu erysyna ratyre rỹiraki, kia aõ aõkõ wadee rare. Tiiboho aõ tỹmyra riwabedeerynyõre. Deuxu-ò tahe ibutumy iny wiwesehy rare. Deuxu riwateònyrenyre judeukõdu mahãdu-ò Rybewihikỹ wahisidỹỹmy. Kia Joaõboho wiwesehyylemy widi rõhõtinyre riwawehitynanyra jiarỹ Banabe-wana. Tai tahe iwese Pedro judeukõdu mahãdu-ò rare. Tiiboho tahe ritỹỹnynymyhỹke judeu mahãduòle wahe.

¹⁰ Urile riwatyhenyra iny aõkõdu mahãdu ari-wiòhenanymahãkemy. Kia juhUU ariwinykemy watxiwãhãre.

¹¹⁻¹² Atxiòkia-ò Pedro rehemyhỹreu jiarỹ tuu rarybere timybo ibinamy riwiny my ihỹremy rexiitxenany myhỹreki. Hãbuõ Txiau-ribi rehemynyõrau, tii judeokõdu mahãdu-wana riroxire. Irahudi tahe dehemynydenydeu, riroxiõhyylemy rexitare. Judeu mahãdu rybe lau ruberure.

¹³ Ijõ judeu iwesele rotỹỹnyre. Ihewoludu Banabe tulere.

¹⁴ Tuu rabireu, òbitimy aõkõ Rybewihikỹ inatyhy wesemy aõkõ rotỹỹnyny raremyhỹ tahe rarybere ibuturu-ò, Pedro-ò. Kai judeu mabekeki, tahe judeokõdu mahãdu wesemy tanabededỹỹnanamy ahãte. Uritere judeukõ mahãdu judeu mahãdu wesemy isỹdỹỹõmy.

¹⁵ Jiarỹboho tahe judeu mahãdumy reamahãrenyre. Judeukõ mahãdumy aõkõ watxiwãhãrenyre.

¹⁶ Iny bede ywidỹỹna aõkõ iny ritamy roire.

Kia Kristu iny rityhynymyhÿrele iny ritamy roire. Bede ywina ywityhydÿÿna iny ritaõtyhy.

¹⁷ Iny Kristu-ki tarasana ritamy ratxikeki, tahe òrarudu tyhymy ronykeki, Kristu aõbo òraruna widÿÿna rare? Aõkõre.

¹⁸ Jiarÿ bede ywiny ywidÿÿna-ò aròòsekeki, òrarudumy ararekre. Kia jiarÿ idi ariatymy rÿimyhÿre ixityre ariwinykeki òrarudumy arareke.

¹⁹ Jiarÿ bede ywina rarumy rãire wese, Kristu-ò warumy ararekremy. Kristu-wana jiarÿ raitxeòkirubudÿÿnanyamahãre.

²⁰ Jiarÿ ixidee warumy aõkõ wahãre. Kristu tahe wawo-ki riwarudÿÿnanymy ihÿre. Warumy watzireriwana Deuxu iriòretyhydÿÿna òrarukile warumy wãhãre. Tii waluumy ratximyhÿre. Tahe wadee rexiwahinyra.

²¹ Deuxu ruxetòedÿÿna aribynykemy aõkõ watzireri. Bede ywina tyhydÿÿna òraru-ki ywityhydÿÿna tahe inyõ ritakemy ratzireri. Kia-di inatyhymy inyõ rexitakeki tahe, Kristu uriòle rurure.

3

¹ Alaxia mahãdu timybo tahõtinyteri kaiboho õhõtibede-di rierykõrenyrene. Kia-di òsana tahõtinyre. Moòwòru ijeranamy ahãtenyte. Jesuisi Kristu itxeò-ki rururedi taholatentytyhyta. Õhõti-ribi aõbo kia rosare.

² Kiale arierykemy watzireri timybo tahõtinytenyteri: Deuxu Tyytybytyhy temytenyta bede ywina widÿÿnamy aõbo ada inatyhyna tyhydÿÿnamy aõbo.

3 Juhu urile tetyhynytenyte idi ixiumykile tadexityhynomy ahãtenyte, bede ywina ywisidỹna wahe.

4 Kaiboho òbitimy tahõtinyõtenyte. Kia aõbo aõhõkỹmy tatỹnytenyte uriòhyyòle?

5-6 Aõkõre, uriòkele aõkõre òsana tahõtinyteri. Deuxu Tatytybytyhy adeereny diwahinyde. Kia aõbo riwinyre bede ywina ywisidỹ kaiboho tamahãtenyteki? Aõkõre, tetyhynymahãteki kia riwinyre. Deuxu aõna aõna wiwihikỹ akoreny-ki riwinyre. Kia sohojile iny ritake. Abraõ Deuxu rityhynyre. Tai tahe tamy òbitimy rare Deuxu-ò, iòraru iribi riixãwididỹnyraki.

7 Tai ibutumy rityhynymyhỹre mahãdu Abraõ riòremy rỹira.

8 Tyyriti-ki roimyhỹre kia: —Deuxu heka judeu mahãdu sohojile aõkõ riòbitinykre. Ibutumy iny riòbitinykre ityhydỹ erylidỹna òraru-ki. Rybewihikỹ erylisyne Abraõ-ò juhuhu dehemynyde. Kia wese Tyyriti doide: —Aòraru-ki ibutumy iny-ò deysana kanakre.

9 Tahe ityhydỹdu mahãdu Abraõ wesemy teysare. Abraõ dori ityhydỹdu rare.

10 Inyõ bede ywina rityhynyõkeki, Deuxu txuhòbina kedeake. Jesuisi-ò tyhynale iny kiditakre. Kia Tyyritidỹna dori roire: —Inyõ ibutumy bede ywina riwinyõkeki, tamy Deuxu txuhòbina kedeake.

11 Òbiti mahãdu rityhynomy ronykre. Kia riki Ritidỹna roire. Tahe bede ywina heka inyboho aõkõ riòbitidỹnyre.

12 Bede ywina heka iwitxi rare ityhyna-ribi. Tahe inyõ bede ywina rityhynomy ratxikeyi, tii

ibutumy rityhynymy rarehyyke.

¹³ Inyboho Deuxu bede ywina rikiy-winyrenyōkeki, Deuxu txuhòbina inydeereny kedeakre. Kristu tahe kia-ribi iny ritare. Tule inyòwòruna òraru-ki rexilamadỹnyre inydee iòwydỹna-ki. Beteheke Tyyritidỹna roire: –Inyò òwòru itxeò-ki ritamadỹnykeki, tamy txuhòbina kedealekre.

¹⁴ Deuxu narybede heka Tatytybytyhy iny-ò ri-wahinykemy. Wiji tahe inyō rityhynykeki, Deuxu Tyytybytyhy ritakre. Tai Abraō deysana inydeereny rehemynyre Jesuisi Kristu òraru-ki.

¹⁵ Waseriòreboho, jiarỹ hābu wesemy ararybekre. Iny inatxi jurasadỹna ritina riwinykeki, inireny ritidikeki, inyō riwitxiranyōtyhy. Tai ijō witxira riritinyōtyhy.

¹⁶ Boholabenyke, Deuxu juhoo Abraō dee narybede: –Abraō riòre hewoluduō Kristumy. Abraō riòre sōwe dee rarybeōre. Sohojideele rarybere. Tahe tariòre-ò Kristumy rarybere.

¹⁷ Tuheka rarybereri: –Deuxu juradỹna wese juhoo rarybere, 430 beòra bede rỹire idi tahe bede ywina nade. Kia Deuxu juradỹna ri-ixāwidinyōtyhy.

¹⁸ Tarasany bede ywinawidỹna òraru-ki kidiwahinykeki, wahisidỹna aōkō heka rare. Tai Deuxu heka Abraō-ò jurasadỹna riwahinyre. Iòwydimy aōkō juhoo dori rarybere tii kidiwahinykemy.

¹⁹ Aōherekibo heka nade? Kia nade òraruna òraru-ki Kristu nadeule kỹny juhu ludu wese aōkō roire. Kristu heka Deuxu deòdỹna rare. Iwese Deuxu rarybere wese riwahinyre. Tii Abraō

riòre riòre-ribihyy reare. Ìjummy bede ywina nade. Iny itya ludu debò-ki rehemynyra. Moisesi iwahidỹỹdure.

²⁰ Boholake, Moisesi sohojile aõkõ itya ludu ratxireri bede ywina riwahinyreu. Deuxu tahe sohojile rare irybe riwahinyreu.

²¹ Bede ywina aõbo Deuxu jurasadỹỹna riixãwidinyke? Aõkõre. Bede ywina umy ituedeõna riwahinykeki, òbitidỹỹna inatyhymy bede ywina nade. Tahe aõkõre.

²² Deuxu Tyyriti rarybere: ibutumy iny òraruna-di ratxireri. Kristu iny rityhynykeki, Deuxu jurasadỹỹna tamy riwahinyke.

²³ Ityhydỹỹna rehemynymynykoki bede ywina iny rityhynymyhỹre rõtenawo-ki inyboho roire wese. Kia-ò iny riraõhyymy rỹimyhỹre inatyhydỹỹna kedehemynykemy.

²⁴ Uladu bedeerydỹỹdu wese bede ywina rare inydeereny. Kristu rehemynykõu, inyboho bede ywina rityhynyrenyre. Tai Kristu-ò inyboho òbitimy ronykremy ityhydỹỹna òraru-ki.

²⁵ Ityhydỹỹna-ò iny rehemynyre, uladu bede erydỹỹdu-ribi ixãwimyhỹre.

²⁶ Kristu-ki ibutumy Deuxu riòre atx-imahãtenyte ityhydỹỹna-ki.

²⁷ Ibutu dori Kristu-ò taratisebenyteu, Kristu wesemy tatỹỹnyte.

²⁸ Kristu tỹnydỹỹna-ki wiribi hitximy aõkõ boibe, judeukõdu mahãdu, iny-wana, deòdu deòdu aõkõ-wana, ijoi hãwyy-wana ibutumy wiwese wesele Kristu-ki rỹike.

²⁹ Kristu-ki mabekeki, Abraõ riòre riòrelemy mabekre. Jurasadỹỹna rareasadỹỹdumy

atximahãtenyte.

4

¹ Ijyyõ arelyykre –rareasadỹỹduõ deòdu wesemy raremyhỹ tii uladumy rareu, ibutu wedu rare hãre wahe.

² Urile tyby rarybere raumynykõule, tii tati-biedỹỹdu rybe rityhynymyhỹre.

³ Kia wese iny rare. Uladu wesemy bedede aõmydỹỹnana rityhynymyhỹre juhuhu.

⁴⁻⁵ Iribi tahe bededỹỹnana he rehemynyra. Deuxu tahe Tariõre diteõnyde ijadõma ririõredỹỹnykremy. Bede ywina tyhynakremy reare. Tii nade bede ywina tyhydỹỹdu mahãdu tarasamy kia tyhyna-ribi ritakemy tariõre wesemy ritibienykemy.

⁶ Deuxu Riõre wesemy iny ihỹreki iny-ki ratximyhỹreki, Tatytybytyhy inywo-ò risỹnyre. Tai inywo-ribi rarybemyhỹre: –Waha, Waha.

⁷ Wiji tahe deòdu wese aõkõ atxiteri, Deuxu riõretyhy wese atxiteri. Tule Deuxu rareasadỹỹduõle tate.

⁸ Juhuhu Deuxu teeryõtenyte. Kaiboho deuxu witxira wese tetyhynytenyte –deuxu inatyhy aõkõ tetyhynytenyte.

⁹ Ka tahe Deuxu teerymy ahãtenyte tetyhynymahãte. Deuxu anaerynymyhỹdenyde. Ixyby bedede aõmydỹỹnana-ò òõsedỹỹõmy, arawiõhenyõreki. Deòdumy aõkõ ixyby rỹimy boibeke.

¹⁰ Txu yrubudỹỹõmy, ahãdu yrubudỹỹõmy, beõra yrubudỹỹõmy.

11 Inatyhymy ada aõkõre aõbo waaõmysỹdỹña adeereny reõnonyra?

12 Wawesehyymy boibeke. Jiarỹ dori tatemahã wese raremahã, waseriõreboho. Kaiboho wadee aõbina tewinyõmahãtenyte.

13 Kia teeryte. Jiarỹ juhoo adeereny Deuxu rybemy rarybereu, jiarỹ iu wabinawãhãu.

14 Wabinana heka isirare adeereny, ihãre tahe waderaõre tahe wadi arukirenyra, iwese ýju Deuxu-ribi jiarỹ anade wese kaiboho tiwamytenyte, iwese taheka Jesuisi Kristule jiarỹ rare wese wadi tewisỹnytenyte.

15 Titxibo rare eysanareny juhoo adi toite wahe. Kaiboho aruereny wii tesỹnymy toitemyhỹ kaiboho wakyrenyeki.

16 Jiarỹ aõbohe aõludumy relera, inatyhy rybe adeereny rarybereki? Aõkõhyre.

17 Hãbuõ arãitxenanymyhỹrenyre. Aluu wese heka ratxirerimy ihỹre. Aõlõnamy dori rarunyreri. Tii-boho wabiõwana-ribi atarasamy adi ihỹrenyre.

18 Aõwihikỹ erysomy marurunyke. Tii tahe awire, awanale watxireriki aõkõ.

19 Wariõre wese, adeereny aõhõkỹmy ratỹnyre, hãwyy reamyhỹre mytxitxi wese jiarỹ rare adeereny Kristu awo-ki rexilamadỹnyhykemy.

20 Awanareny ararekemy watxireri. Tai tahe warybe witxira-di kia anarybekemy watxireri. Aõhebo adeereny heka arasỹnyre arawiõhenanykemy watxiwãhãre. Timybo reerykõre dori.

21 Inyõ bede ywina tyhydỹdỹdumy ratxikeki, wadee manarybeke kiamy: aõmybo bede ywina raryberamy teeryteri?

²² Kia Tyyritidỹỹna-ki roire Abraõ riòre inatxire. Juhuu ludu teòdu-ribi, Haari-ribi, reare tabire-ludu-ribi. Ijõ, Sara-ribi, ihãwyytyhy-ribi reara, deòdu-ribi aõkõ.

²³ Deòdu riòre ibutu dee wese nade. Abraõ hãwyy riòre aõkõre Deuxu rybewahisidỹỹna xiery reare.

²⁴ Kia ijyy-di rawesenanyreri. Inatxi hãwyy inatxi jurasadỹỹna wese heka rare.

²⁵ Ijõ Haari inire, deòduni. Iriòre deòdumy rarekemy reare. Sinai Hãwãlò wese tii rare. Kowa tyre-ki bede ywina inydee riwahinyre. Jerusalẽ wesemy roimyhỹre kia mahãdu deòdumy dori rỹira, tariòre-wana.

²⁶ Jerusalẽ tyhydỹỹna mahãdu, biu ludu tahe deòdu wese aõkõ rare, ixinamy inyboho roire. Abraõ hãwyytyhy riòre wese inyboho roire.

²⁷ Tyyritidỹỹnaõ dori roire: –Hãwyy ariòreõ beysakre. Birajuakre ariòrekõhãrele beysamy ariòredikire heka. Hãwyy risina riòre sõwetyhyre, hãwyy ihãbu-di ratyre.

²⁸ Waseriòreboho, kaiboho rybe ywisidỹỹna riòre wesemy ahãtenynte, Ijai wesemy.

²⁹ Iwese ibutu ludu wesemy reareõ aõbina riwidỹỹnanymyhỹre. Deuxu Tyytybytyhymy reareõ. Wiji, tahe kia weselemyhỹre.

³⁰ Tyyritidỹỹ rarybera: –Biteònyke deòdu tariòre-wana. Rareasadỹỹdu ibutumy rimykre. Hãwyy deòdu aõ aõkõ rimykre tariòre-wana.

³¹ Waseriòreboho, deòdu riòre wese aõkõ inyboho roire. Hãwyytyhy riòre tahe iny roire.

5

¹ Kristu inyboho ritare ixinamy inywe-

duõduõlemy roirekemy. Kawese rokoirekemy. Deòdu wese ixbyby rukunyrenyõkre.

² Jiarỹ, Paulo, adeereny rarybereri: inyõ notykyresyna-ò ròòsekeki, Kristu riwiòhenanyõhyymyhỹre.

³ Ixityre ararybeke. Inyõ rinotykyresynanykeki, bede ywina ibutumy tii riyrubunyhyyke.

⁴ Inyõ bede ywina rexiòbitinyratxikeki, Kristu-ribi rexihitxidỹnyymyhỹre, ruxetòena tyhyna-ribi rexitare.

⁵ Deuxu riwaòbitinyrenyre Tatytybytyhy òraru-ki kia retyhynyrenyre. Kia reraòrenyre.

⁶ Jesuisi Kristu-ò notyky resyna aõ aõkõ rare. Notyky resynakõ tule aõ aõkõ rare. Inatyhynamy luunamy aõ rare.

⁷ Juhuu awimy tuu tatyynmahãte, inatyhyna-ki ijera wihikỹmy teamyhỹte, moõ inatyhyna-ribi anaixãwididỹnyde.

⁸ Deuxu aõkõ atarasadu juhUU ixãwididỹnyde.

⁹ Inyõ paõ riwinykeu, ibutenode ritxiwikeki ibutumy ratarinyke. Inyõ ibinamy urihimyo arabedeerynykeki sõwemy ribinadỹnyke.

¹⁰ Jiarỹ Wanyrỹ retyhynyre, kaiboho wawesemy mohõtinybenykemy adireny watzireri.

¹¹ Waseriòreboho jiarỹ waòludu dire. Kia tahe riteòsinyre notyky resynamy rarybeõre ijõ wamy raryberehãre. Kia ararybekeki sõwemy wahemy kanakre. Itxeò tỹnydỹỹna rybe rityhynykremy.

¹² Kowa mahãdu òte rexihukemy idi watzireri. Adeereny aõbina diwinymyhỹdenyde.

¹³ Kaiboho Deuxu arateònyrenyre, urile

òraruõmy boibeke kaiboho bede ywina-ribi ixinamy boibeke. Wii biwiòhenanymyhỹbenyke, wiluurenykemy.

¹⁴ Bede ywina ibutumy rexibutumyrye rybe-ki kia tahe rare: —Inyluuke ixiluure wese.

¹⁵ Wiwana bõrenybenykeki, kaiboho widi buruakeki, bexihãrubeny ibutumy wii mahubenyheny.

¹⁶ Tai jiarỹ rarybere, Deuxu Tyytybytyhy deewimy boibekemy deòbiredỹỹna iwidỹỹõmy boibeke.

¹⁷ Deòbiredỹỹna dori Deuxu Tyytybytyhy òluduna-ki ramyhỹre. Wimỹ òludurenyre. Tai aõbo adeereny awire iwidỹỹ adeereny isirare.

¹⁸ Tahe, Deuxu Tyytybytyhy arateòsinyrenykeki, bede ywina ywidỹỹna aõkõ bityhynyke.

¹⁹ Deòbiredỹỹna aõna aõnamy dỹỹnana-ki kia roire: aderanadino, aõbinade, raykyõmy, òta òta,

²⁰ suritxoomy àlàdỹỹna, òwòruna wii, òlududỹỹna, aõbinaluu, ihãru, kyara, wobiredỹỹna, wiribihitxina,

²¹ ibutu aõmydỹỹna ixixiburedỹỹ, axaxaluu, rỹsỹnaluu byrehekỹ, tule ijõ aõna aõnà sõwemy kawesere. Inyõ kia aõna aõnawidỹỹ rierykeki, Deuxu òlòna rareasadỹỹdu aõkõ roikre. Tuu rarybere juhuule.

²² Ka heka Deuxu Tyytybytyhy aõmydỹỹnanamy rybena roire: iwahidỹỹna kia rỹire, tii dori inywomy rỹira. Wiluuna, deysana, ywina, ruxetòena, wina, òbitidỹỹnana,

²³ ibutu-ò awina, ixidee inytyhyna, ixiryrydỹỹna, tai bede ywina ihoõhyre kia-ò.

²⁴ Kristu hõrõ mahãdu kia itxeò-ki ritidirenyre: deòbiredỹỹna, aõmydỹỹnana bina-ribi, deòsana

aõmydÿÿnana-ribi

²⁵ Inyboho Deuxu Tyytybytyhy-di rokoirekeki Deuxu Tyytybytyhyry-ki rakariarenykre

²⁶ Ixi deàlànararòsò luukemy aõkõ rakatx-imyhÿrenyke. Tai tahe ixixiburedÿÿna-di aõkõ, rakatxirenyke. Wiòbiredÿÿna-di rakatxirenyõke.

6

¹ Waseriòreboho. Inyõ òraruna-txi resekeki, kaiboho ywina-di biòbitinybenyke. Bexihãrumahãbenyke kia òraruna-txi ixẽõmy boibekõkemy. Kaiboho dori, Deuxu mahãdu toite wahe.

² Wiitxykywydywesemy wii biwiòhenanybenyke ibutu aõmydÿÿnana-ki. Iwesekeki, Kristu bede ywina tetyhynmahãtenyke.

³ Inyõ ixidee aõlemy rõhõtinykeki, tahe tii aõhyy aõkõ rare, tii rexiitxenanyhÿre.

⁴ Ixinamy iny sohoji sohoji taaõmydÿÿna-ò rethemyhÿke, aõhebo rotÿÿnymyhÿremy wahe. Idi tahe ixi aõmydÿÿnale-di kedexityhynmyhÿkre, tabireludu aõmydÿÿna-di aõkõ.

⁵ Iny sohoji sohoji dori taitxyky riwymyhÿke.

⁶ Inyõ Deuxurybe erydÿÿna ijõdikewana tabe-deerydÿÿna mahãdu-ò ibutumy ersyna wiwi-hikÿle-di rirareamahãke. Tule bedeery mahãdu heka tohodÿÿna mahãdu-ò aõna aõna wihikÿ ri-wahinymyhÿre.

⁷ Ixiitxenadÿÿõmy. Inyõ heka Deuxu itxenadÿÿõmy alòbòròna-ò iny ribòrònykeki, tiile tahe raumynyhyymyhÿre.

8 Inyõ òraruna ribòrònykeki, rubule taumy-ki ritake. Inyõ Deuxu Tyytybytyhy deewimy tuu rotỹnykeki umytuedeõna ritake.

9 Aõwihikỹ widỹhyymy boibeke. Kia-ki el-emy ruburenyõmy. Aõwihikỹ widỹhy boibekeki, adeereny aõwihikỹ wahidỹna wese kanake.

10 Ibutumy inydeereny aõwihikỹ widỹ-ki inyboho abededỹnanawikeki ibutumy iny rikiwiòhenanyrenemy, rỹkỹirenyke, ityhydỹdu mahãduõ bexiywinyhy ahãbenkemy iwiòhedỹ-ò.

11 Tuhe, jiarỹle ariritinykre, Paulo wahe. Betehebeny inihe ritidỹna nihikỹ reritinyra wadè-di.

12 Inyõ ayreny-ki wohyna ixidee rimykeny ratxireri, kia adeereny õtyky resynamy adi ratxirerihyymhỹre. Kristu itxeõmy tiiboho ritỹnyrenykeu aõhõkỹmy rotỹnyõmykemy rõhõtinyinhỹre.

13 Notyky resyna mahãdu bede ywina rityhynyõre. Tiile rexityhynymhỹre. Kaiboho irybe-ò boholakemy atxiteri.

14 Jiarỹ arexiwowydynanyõhyymahãkre, Wanyrỹ Jesuisi Kristu itxeò-di areysakre, biu-ò hena òraru-ki wahe. Bede aõmydỹnana waki rỹimyhỹre, itxeò-ki retamadỹnyra waribi ixãwira.

15 Notyky resynadỹ aõ aõkõ rare. Notyky resynadỹkõ tule aõ aõkõ rare. Urile biu-ò hena-di boibekele tahe aõ rare.

16 Kia bede ywina bityhynybenymy boibekeki, Deuxu-ribi ywina, ruxetòena, adeereny kanakemy idi watxireri. Tule Deuxu mahãdu ibutu-ò, judeu mahãdu wese dori ratxireri.

¹⁷ Karibi tako-ò tahe inyõ waixiradỹỹõmy ararekre. Beydỹỹna dori waumy-ki roimyhỹre, Jesuisi rybe rybemy rybedu òraru-ki.

¹⁸ Waseriòreboho, Jesuisi Kristu ruxetòena akireny rỹikemy watzireri. Kie.

Deuxu Rybe Tyyriti **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 18 Apr 2025 from source files
dated 29 Jan 2022

55ce0bcd-101e-52a3-984e-847027efe150